

Isnin, 6 April 2020 | 4:17pm



Orang ramai membeli barang keperluan di Pasar Besar Kuantan, Kuantan. - Foto NSTP/ Asrol Awang

217 anggota, pemantau pantau harga barangan

Oleh Asrol Awang
bhnews@bh.com.my

KUANTAN: Seramai 217 pegawai penguat kuasa dan pemantau harga Kementerian Perdagangan Dalam Negeri dan Hal Ehwal Pengguna (KPDNHEP) Pahang melakukan pemantauan harga barang keperluan setiap hari sejak Perintah Kawalan Pergerakan (PKP) dikuatkuasakan pada 18 Mac lalu.

Ketua Pegawai Penguatkuasanya, Ahmad Fitri Ali, berkata pemantauan itu membabitkan pemeriksaan di 43 pasar awam di seluruh Pahang, diikuti 98 pasar raya, 1,357 kedai runcit dan 178 kedai serbaneka.

Katanya, kementerian itu juga turut melakukan pemeriksaan di 209 farmasi untuk memastikan pengguna mendapat bekalan dan membayar pada harga berpatutan.

“Pemantauan yang dilakukan lebih bertumpu kepada harga barang keperluan seperti ayam, daging dan ikan selain sayur yang menjadi tumpuan pengguna.

“Berdasarkan pemantauan itu juga ada barangan yang mengalami penurunan harga seperti ayam dan ikan.

“Oleh itu, kita harap harga barang keperluan tidak naik sehingga membebankan pengguna sepanjang tempoh PKP ini,” katanya ketika dihubungi, hari ini.

Ahmad Fitri berkata, di Pahang, sebanyak 270 pemborong memberi jaminan menghantar bekalan bagi menampung keperluan pengguna.

Sehubungan itu, katanya, orang ramai dinasihat tidak melakukan pembelian panik, sebaliknya hanya membuat pembelian mengikut keperluan.

“Jika menghadapi masalah, orang boleh membuat aduan rasmi di portal e-aduan.kpdnhep:<https://eaduan.kpdnhep.gov.my> atau menghubungi pusat panggilan di talian 1-800-886-800,” katanya.

<https://www.bharian.com.my/berita/wilayah/2020/04/673712/217-anggota-pemantau-pantau-harga-barangan>

